

Labiaga ikastolak sinadura bilketa hasi du DBH lerroa legeztatzearen alde

Ikastetxeari sustengua eman diote jada Oteizak, Jimeno Juriok eta Haritzelharrek

Berako (Nafarroa) Labiaga ikastolak bere Derri-gorrezko Bigarren Hezkuntza (DBH) lerroa legeztatzearen aldeko sinadura bilketa hasi du. Kanpaina hastapenetan badago ere, jada Jorge Oteiza eskultorearen, Jose Maria Jimeno Jurio historialariaren eta Jean Haritzelhar euskaltzainburuaren sustengua lortu dute. Xedea da ikastolan DBH alegaltasunean ikasten ari diren 100 ikasleen egoera konpontzea.

Juan Kruz Lakasta / Iruñea

LABIAGAKO ikastolak Nafarroako Gobernuarekin duen arazo latza duela lau urte sortu zen, 1994an DBH eskaintzen hasi zelarik. Ikastetxeak legearen arabera baldintza guztiak betetzen bazituen ere, Gobernuak ez zion DBH eskaintzeko baimen ofizialik eman. Egun egoerak bere horretan dirau: ikastolak baldintza guztiak betetzen ditu, eta Gobernuak ez dio baimenik eta dirulaguntzarik ematen. Alta, arazoa duela lau urte baino larriagoa da; izan ere, aurtun 20 ikaslek DBHa amaituko dute. Ikasgai guztiak gaitunduta ere, ikasleok ez dute titulurik jasoko, ezin izanen dituzte ikasketak segitu.

«Caridad Tones, Ana Arburu, Jose Mari Irazoki... DBHko ikasle horien gurasoak dira, Nafarroako hiritarrak dira, baina Nafarroako Hezkuntza kontseilari Markotegik eta Hezkuntza idazkari nagusi Arellanok ez dute haien ahotsa aintzat hartzen, ez diote garrantzirik ematen. Guk hiritar guztiok berdinak garela uste dugu, baina haiei agian garrantzitsua goa irudituko zaie Oteiza, Jimeno Jurio edota Haritzelharren ahotsa. Hori dela kausa, sinadurak biltzeari ekin diogu», azaldu zuen



Berako ikastolako ordezkariak, atzoko agerraldian.

JOXE LACALLE

Labiagako ikastolako zuzendari Joxean Oizek, sinadura bilketa aurkezteko atzo eskaini prentsaurrekoan. Sinadurak lehenbizi Bera eta Bortziritako elkarten, Herriko Etxeen eta hiritarren artean bilduko dituzte, eta jarraian Nafarroa osoan.

Parlamentuari laguntza

eskaera • Bi zutabe nagusi ditu, Oizek iragarri zuenez, milaka nafarrek sinatuko duten agiriak: batetik, egoera salatzen du, eta, bestetik, Gobernuari ahalik eta lasterren konpontzeko eskatzen dio. Oizek espero du sinadurak aski izatea Hezkuntza Saileko buruek orain arte izan duten jarrera birplanteatzera bultzatzeko. Nolanahi ere, badaezpada

Parlamentuko taldeekin harremanetan hasi dira. Talde guztien sustengua lortzea espero dute, eta HBk dagoeneko proposamena aurkeztu du Legebiltzarrean, eskatzeko arazoa konpontzeko, Labiaga ikastolari azken lau urteotan eman ez zaizkion dirulaguntzak pagatzeko, eta Markotegik eta ikastolako ordezkariak Parlamentuan agerraldia egiteko. Bestalde, ikastolak Nafarroako Administrazio Arazoetarako Auzitegiaren aitzinean salaketa aurkeztu zuen 1996. urtean. Arazoa da Auzitegiaren salaketa-butzadura handia dagoela, «eta ikasleak ez direla tomateak edo eta Coca-cola latak, ezin dute itxaron».

Oizen aburuz, Hezkuntza Sai-

laren jarreraren giblean dagoen arazoa da «ez dutela ulertzen ikastolako langileek lan orduetatik aparte duten inplikazioa, ikasleak pozik joaten direla ikastolara, eta gurasoak kalitatezko irakaskuntza proiektu baten aldeko apustua egin dutela, ilusio handia daukatela, eta hori aurrera atera ahal izateko zama administratibo eta ekonomikoa bizkarreratzeko prest daudela». Hori dela kausa, «Gobernuaren usteltze estrategiak» porrot egin du. «Esan ziguten 'ikastolen asmo espansionistei' aurre eginen zirela, eta ikustekoa zela noiz arte jasango genuen. Hemen gaude, egunak gainean ditugu, eta orain haiei galdetu behar zaie zer egin behar duten». X

Sustengu anitz jaso ditu euskaraz ikasteko eskubidea aldarrikatzeko Sortzen-ek gaurko deitu duen manifestaldiak

■ *Protestaldia arratsaldeko zazpietan abiatuko da Udaletxe plazatik, eta Gaztelu plazan amaituko da*

Erredakzioa / Iruñea

EUSKAL eskola publiko berriaren aldeko Sortzen plataformak deituta, D ereduen aldeko —euskara hutsezkoa— manifestaldia egingen dute gaur Iruñean. Protestaldiaren leloa *Euskaraz ikasteko eskubidearen alde* izanen da, eta 19:00etan abiatuko da Udaletxe plazatik. Deialdiaren kin bat egin dute IU, HB, Batzarre, EAJ, ELA, LAB, EILAS, Gazte Abertzaleak, Jarrai, AEK, Donianitz (Iruñeko Donibane Auzoko Euskara Taldea) eta Iruñerriko

Sanduzelai, Ave Maria, Axular, Berriozar eta Arturo Kanpion ikastetxe publikoetako guraso elkarteek.

IUren idurikoz, D eredua «Iruñerriko ikastetxe publikoen berpizkundea eragiten ari da», eta, besteak beste hori dela kausa, «merezi du, gutxienez, Hezkuntza Departamentuarengandik gaztelaniazko ereduak jasotzen duen tratamendu bera jasotzea». Hala ere, IUren arabera «eskolak gure Erkidegoaren aberastasun handiaren zati garrantzitsua den elebitasuna onartu behar du».

HBren aburuz, euskaltzale guztiek parte hartu behar dute gaurko manifestaldian; izan ere, «test bat izanen da: gaingintzen bada UPNk euskaraz ikasteko eskubidea errespetatu beharko du, eta gaingintzen ez bada UPNk euskararen lepoa ito arte estutuko du». Indar abertzaleak dioenez, «Nafarroako gizarte osoak uste du UPNko Gobernuak euskara hiltzeko egiten ari den politika aldatu behar duela».

Batzararren ustez, «Nafarroako Gobernuak D ereduari oztopoak jarritz balazta bilakatzen da

haien ikasketa guztiak euskaraz egin nahi dituzten Nafarroako hainbat gazterentzat. Hori dela-eta, «garrantzitsua» da manifestaldira joatea, bai eta «duela gutxi Sortzen-eko protestaldi batek poliziarengandik jasan eraso eta Espainiako Gobernuko ordezkariaren jarrera salatze ere».

EAJren iritziz, «euskaraz ikasteko eskubidea kolokan da; batetik, Iruñeko zenbait auzotan euskarazko lerrorik ez delako eskaintzen, eta, bestetik, Batxilergo Artistikoa euskaraz ikasteko aukera ukatzen delako». X

Urruñako ikastolaren aldeko manifestazioa deitu dute iganderako

■ *Poulouk urrats bat egin badu ere, ikastola egiteko hitza betetzeko eskatu dute*

Erredakzioa / Baiona

JOAN den ekainaren 5ean Poulou auzapezak eskola publikoko prefabrikatuak Urruñako ikastolak erabiltzeko baimena eman zuen. Urruñako ikastola elkarteko kideek diotenez, Poulouk urrats bat egin du, baina, hala ere, ikastola egiteko eman zuen hitza betetzeko eskatzen dute elkartekoek. Joan den abenduaren 16an Herriko Etxeak erabaki zuen ikastola eraikitzeko lur saila ematea, baina hartutako erabaki hori ez da bete, eta auzia geldirik dago. Elkartearen arabera, administrazioan izan diren atzerapenak jartzen dituzte aitzakiatzat, baina horretaz gain beste arrazoirik badago proiektua atzeratzeko.

Hori dela-eta, manifestaziorako deialdia egin dute Urruñako ikastolako elkarteko kideek. Datorren ikasturtean haurrek lekua izango badute ere, ikastola egokia izateko aukera oraindik ez dela-eta bete, ikastolaren alde egin nahi duten herritar guztiei dei egin diete datorren ekainaren 14an, goizeko 11:00etan herriko etxearen aitzinean elkartzeko. Auzapezak egin beharrekoa betetzeko eskaera egingo dute manifestazioan bilduko diren Urruñako ikastolaren aldeko herritarrek.

St.Vincent Elkartek behin behineko alokairu baten truke utzitako lekua utzi egingo dute, eta datorren ikasturtean lekua izango dute prefabrikatu horietan. Hala ere, Urruñako ikastolako elkarteko kideek prefabrikatuaren erabilpena onartuko dutela esan dute, baldin eta leku horrek segurtasun batzordearen kontrola eta oniritzia jasotzen badu.

Auzapezaren jarrera ere salatu dute, eta adierazi auzapezak emandako prentsaurrekoan esandakoa xantaia hutsa dela. Auzapezak esan zuenez, «ikastola herritarren jarreraren truke aurrera aterako da». Ikastolak aurrera egin behar du elkartek diotenez, eta horretan ez du zentzurik auzapezak zabaldu nahi duen mezuak.

Era berean, Herriko Etxeak ikastola egiteko eman nahi dituen lurak ez direla egokienak adierazi du elkartek; «bakter batean, parkin baten zokoan dauden 1000 metro koadro saldu nahi baititu». Lur sail horren truke Herriko Etxeak eskatuko duen dirukopuruaz, jasan behar duten egoeraz eta betetzear dagoen hitzaz galdegin dio elkartek auzapezari, beste hainbat gauzaren artean. X